


# TEZAU LITURGIC

1 MAI

## SLUJBA SF. IERARH-MUCENIC MACARIE, MITROPOLITUL KIEVULUI



MINEIUL PECERSKĂI-02  
KIEV, 2007



# Месяца маиа, в 1-й день Служба святому священномученику Макарию, митрополиту Киевскому

## Вечер

Блажен муж: первый антифон.

На Господи, возвах: стихиры, глас 5:

Радуйся, священная главо, Божий избранниче Макарие, душу твою за Православную веру положивый, и истерзание телесе твоего радостно претерпевый, сего ради от Господа на небеси венец приял еси. Того убо непрестанно моли, спасти и просветити души наша.

Радуйся, святителей красото, мучеников честный венче, и исповедников печате золотая, к ихже ликом от подвигоположника Христа причтен был еси, с ними же, о Макарие, о нас молися, еже спасти и просветити души наша.

Радуйся, словесных овец пастырю добрый, лютых волков не убоявыйся, но к стаду твоему издавеча потщися и от нечестивых агарян вольную смерть приявый, душу же свою в руке Господни предал еси. Егоже присно моли, да от духовных волков оградит стадо твое, ко святым твоим мощем притекающее.

Радуйся, молитвенниче наш теплейший, свое нетленное тело посреде церкви во утверждение надежды нам оставивый, и тем утешение в скорбех нам подаваяй, духом же Господеви на небесех предстояй, от Негоже мир испроси душам нашим.

Слава, глас 6:

Преблаженне, премудре, преблагий отче, кто не подивится мужественному стоянию твоему? Исшел бо на смерть аки на пир, и убивающих тело не убоялся еси. Темже и мзду трудов твоих богато на небеси приял еси и со всеми святыми на вечная времена водворился еси, моли о душах наших.

И ныне, праздника.

Вход, прокимен дне, чтения три.

На литии, стихира праздника или храма.

Слава, святому, глас 6:

Приидите, православных собори, и священномученика Христова и исповедника Православия, Макария, Киевскую похвалу почтим, той бо глагол Павлов слышав о Христе, спострадати нам могущем, и молитву над главою своею чтенную исполнити хотя, яко уготовася мзда архиереом, за Евангелие Спасово пострадавшим, таковое страдание и смерть еще

сый в пути ко граду своему изволи, и тако путь в небесное Царствие обрет, его же да не лишит и нас Господь по молитвам святителя Своего, и да дарует нам прежде конца покаяние.

И ныне, праздника или Богородичен:  
Владычице, приими молитвы раб Твоих:

На стиховне стихиры, глас 2.

Подобен: ДOME Евфрафов:

Архиерее Православнии, / во граде Вильне  
иногда собравшися, / руке свои на главу  
Макария возложиша, / но не по мнозех же днех  
агаряне / сию священную главу зверски  
усекнуша.

Стих: Блажен муж, бояйся Господа: в заповедех  
Его восхощет зело.

Оскудевшыя верою / сердца наша, о Святителю,  
/ утверди в любви Божией, / и умерщвление  
страстем нашим испроси, / Христа ради  
умерщвление приявый.

Стих: Честна пред Господем смерть  
преподобных Его.

Потщимся о братие, ревностию Божиею /  
сердца наша исполнити, / да спасение примем  
/ священномученика молитвами.

Слава, глас 8:

О воине Христов неустрашимый, и града Кieва  
утешение и похвало, твоим предстательством не

остави нас, но житие наше в мире сохрани, и братолюбия твоего дар нам ниспосли, да твоею паствою нарицатися достойни явимся.

И ныне, праздника.

Тропарь святому, глас 8:

Божественныя, безкровныя совершая жертвы, кровь твою от безбожных агарян излианную, в жертву непорочную принесл еси Владыце твоему, пастырей Начальнику Христу, Егоже моли, молим тя, пролити гнев на языки, хотящие браней. Страну нашу на вся враги укрепил и стадо твое от всяких бед неврежденно соблюди. Тебе бо крепкаго заступника почитаем, новый священномучениче Русский святителю блаженне Макарие.

Ин тропарь, глас 4:

Ко граду твоему, яко пастырь добрый поспешая, от врагов веры еще в пути сый умерщвлен был еси, но свое нетленное тело яко немолчное научение, посреде великия церкви града Киева предложил еси, еже благоговейно лобызающе, молим тя, святителю Христов Макарие, моли спастися душам нашим.

## На утрени

По 1-м стихословии седален, глас 3:

Приспе священномученика Макария память,  
просветим убо молитвою сердца наша, братие,  
да умиления души наша исполнятся, и приимем  
от Господа благодать во благовременную  
помощь.

Слава, и ныне, праздника.

По 2-м стихословии, седален, глас 4:

Священному твоему предстояще гробу, о  
Макарие, святителю Христов, мужественный  
твой подвиг тепле воспоминаем, покаяние о  
своем малодушии приносяще, и твоего  
предстательства о нас усердно просим, еже  
житие наше исправить и к подражанию тебе  
устремитися.

Слава и ныне, праздника.

По полиелеи седален, глас 1:

Приидите, еже молитв ко святым  
отметающися, и видите нетлением  
процветшья мощы Макария  
священномученика, како умерый живущим  
духа жизни от Господа подает и сердца  
человеческая во умиление приводит, темже о  
своем ожесточении раскаявшись, к  
молитвенному лику нашему приложитися.

Слава и ныне, праздника.

Степенна, 1-й антифон 4-го гласа.

Прокимен: Честна пред Господем смерть преподбных Его. Стих: Что воздам Господеви о всех, яже воздаде ми?

Евангелие от Иоанна, зачало 35 от полу.

Стихира по Евангелии, глас 6:

Да отверзутся сердца наша, братие, к печали небесных славы, еуже прослави Господь пастыря нашего и мученика, того бо святых мощи лобызати потщимся и добре намерение в души наша восприимем, еже за веру стояти крепко, ниже глагол Христовых постыдятся когда, но присно Спаса нашего прославляти, да и Той нас исповесть пред Отцем небесным в день он купно со святым Макарием, предстателем нашим.

Канон глас 8, егоже краегранесие сице:  
Грешнаго Антония приими, святе Макарие,  
песнь.

Песнь 1.

Ирмос: Посеченный несекомаго пресече, и виде солнце землю, юже не виде, лютаго врага вода потопа, и непроходимое пройде Израиль, песнь

же воспевашеся: Господеви поим, славно бо прославися.

Гряди, душе моя ленивая, и к нетленным мощем угодника Божия приникни, и проси Господа твоего, еже достойно святителя Макария прославити и умиление стяжати.

Разум Христов стяжати Макарий потщався, яко добрый пастырь от всех познавается, темже и святительскаго сана достоин является, егоже мученическим венцем Бог украси.

Ехати хошу до града моего Киева, рече Макарий блаженный, архиерейский сан восприяв и от людей препинаемый, да не вдается опасному путешествию, агаряном тамо рыщущим.

Шума вод житейских не убойся, душе моя, Господню волю творити грядущи: бойся же точию греха и гнева Божия, якоже святой Макарий тебе научает.

Никакоже о себе пекийся, но о душах паствы своя, возгревая ревность, посечения мечаго не устращися Макарий блаженный, зане меч той Царствие Небесное исповеднику отверзе.

Богородичен: Порабощенный сладьми ум мой, Владычице и Благая Едина, свободи, и раба истиннейшаго благими делы Твоего сына мя покажи, яко да по долгу славлю Тя.

### Песнь 3.

Ирмос: Утвердися сердце мое во Господе, вознесся рог мой в Бозе моем, разширишася на враги моя уста моя, возвеселихся о спасении Твоем.

Аще и зело грешен есмь и малодушен, но к твоему предстательству, о священномучениче, прибегаю, да всякому земному страху посмеяватися мя научиши.

Град твой соблюдай молитвами твоими, Макарие премудрый, аще бо того в земнем твоём житии, аки святитель не узрел еси, но оный твое нетленное тело со благоговением присно содержит и заступления твоего просим. Онаго града небеснаго желание в душах жителей священнаго града Киева и всего отечествия нашего обновляй, отче, твоими молитвами: и желаний плотских стадо твое избави.

Ангел хранитель нам, святителю Макарие, буди, да священную землю пределов Киевских попирающе, достойний сограждане zde подвизавшихся многих угодников Божиих будем.

Богородичен: Богоблагодатная Чистая, с горними чинми, со всеми мудрыми апостолы, и мученики святыми, и пророки, умоли Сына

Твоего, яко да конечное разрешение грехов приимем.

Седален, глас 4:

Предстателю душ наших милостивый, и твоего града щите и покрове, Макарие мучениче дерзновенне, и архиерею пречестный, твоими молитвами православную веру во стране нашей утверди, и ересей всякое ухищрение от нас далече отжени, да во свете истины добре ходяще, сподобимся обрести благодать в день судный.

Слава, и ныне, праздника.

Песнь 4.

Ирмос: Пророк Аввакум умными очима провиде, Господи, пришествие Твое, тем и вопияше: от юга приидет Бог. Слава силе Твоей, слава низхождению Твоему.

Нашего пастыря добраго, душу свою о людех положившаго, любовью прославим, братие, но не словесы точию, паче же деяньми, ревности Божия и братолюбия исполненными.

Твоим мощем, святителю Макарие, поклоняющиеся людие желанием спасения сердца своя исполняют, и суетнаго жития устраняются, ихже молитвами твоими в сем добром намерении утверди.

Охрани нас, Господи, от колебаний греховных святителя Макария непрестанными молитвами, да верни заповедем Твоим пребывше, Небеснаго Царствия с блаженным пастырем нашим сподобимся.

Никакоже да поколеблется православных вера во граде святителя Макария пребывающих, но да привлечет и маловерных его святым мощем верою поклонятися.

Иерусалиму горнему гражданин Макарий священномученик аще и явися, но и священнаго града нетленною плотию гражданин пребывает, и молитвою своею молящимся к горнему граду возноситься пособствует.

Богородичен: Едина Бога воплотившагося рождшая, Всепетая, Того моли в день страшный вся ны спасти, и муки избавити, живота же вечнаго и света сподоби со всеми добре угодившими.

### Песнь 5.

Ирмос: Мрак души моя разжени, Светодавче Христе Боже, началородную тму изгнав бездны, и даруй ми свет повелений Твоих, Слове, да утренюя славлю Тя.

Язвы души моя исцели предстательством твоим, отче преподобне, язвы телесныя за Христа радостно приявый и от нерадения

исцели мое греховное сердце.

Привожду в молитву о мне, Господи, Макария священномученика, да подаси ми грехов оставление, и уныния всякаго избавиши душу мою, в молитве же даруеши постояние.

Реки Припяти берега кровию святителя Макария оросишася, да ороются же очеса наша покаяния слезами, зане николиже жертва Божия быхом, но волю врага Его творити ревновахом.

Иисуса Господа возлюбив Макарий священномученик, за Того братьий меньших живот свой положи: темже и нас от чудотворнаго гроба своего научает, ближния, яко себе самех любити.

Иже о славе церковней ревнующии христиане, о животе временнем небрегите, зане невозможно есть двема господинома работати, паче же молитв святаго Господня, да и нам мужество души от Христа исходатайствует.

Макарие, святителю Христов, множества людей предстоящих молитв не отврати, но яко кадило благовонное сия приемь, к Престолу Господню со своими вознеси святыми молитвами.

Богородичен: Всесвятая Дево, Слово Всесвятое родившая, души моя всякое уныние и печаль отжени, и благоуспей мой помысл божественная деяти, да верою и любовию славлю Тя.

## Песнь 6.

Ирмос: Иону в ките, Господи, единого вселил еси, мене же связанного мрежами вражиями, яко от тли онаго спаси.

Имаши, душе моя, святых ревности образ, и ко смерти безстрашия Небеснаго ради Царствия: одержатели бо сих на земли умроша и память их погипе, святой же, аки жив предлежит очесем твоим нетленен.

Священномученик Макарий, яко Иона пророк, свою смерть общаго ради спасения предложи, темже живота вечнаго и сам сподобися, и наше житие к тому молитвами своими возводит.

Воистину отец людем твоим был еси, Макарие святителю Христов, занеже инок сый обители Виленския о просвещении книжном православных христиан попечение присное являл еси.

Яко твоя паствы киевския чада, молим тя, священномучениче, и нам свыше духовное просвещение невидимо подавай, да разсуждению добра и зла чувства наша научатся.

Богородичен: Поем Тя вернии, Богоблагодатная Владычице, препетаго бо Бога плотию родила еси: Егоже умоли, Нескверная, граду и людем Твоим в мире спастися.

### Кондак, глас 3.

Подобен: Дева днесь:

В мире сый не от мира был еси, но небесный гражданин еще от младости твоя показался еси, темже святительским саном достойно почтен, еще и мученическим венцем украсился еси, отче преподобне, Христа Бога моли дароватися нам велией милости.

### Икос:

Град Вильна твоим житием, святителю, хвалится, о твоих трудах, молитвенных же и книжных, свидетельствуя, но священный Киев нетлением мощей твоих прославляется, имже безчисленнии людие покланяющиеся, Господа славословят, тебе же непрестанно вопиют: отче преподобне, Христа Бога моли, дароватися нам велией милости.

### Песнь 7.

Ирмос: На поле Деире иногда мучитель пещь постави на мучение богоносных: в нейже три отроки песнословяху, единого Бога, троично воспеваху глаголюще: отец Боже, благословен еси.

Тебе, святителю Христов, молим: зриши от небес благочестия в земли нашей оскудение, зриши душ человеческих уныние, убо от Духа Божия,

на Тебе почившаго, дарования веры твердыя кающымся подаждь.

Егда сан иераршеский на земли восприял еси, Макарие святителю, тогда святая Церковь Православная в угнетении пребываше, но твоими подвиги крепость принимаше, ныне убо к тебе молитвенныя руке подъемлет, твоя просяще помощи.

Макарие, священномучениче и пастырю, не остави стадо твое лютым волком на расхищение, но сих уста хульная загради, верныя же в вере утверди.

Апостола Нафанаила сомнящася древле Христос словом веру утверди, под смоковницею сядяща сего видети рек. Убо и ты, святителю, сомнящымся отверзай душевныя очи, да и тии верою Христа исповедят.

Книга разума исполненная, и всякое сомнение отщетевающая рака чудотворных мощей твоих нам является. Не ослепляйте убо очес ваших, людие, но ум свой и сердце к покаянию и вере отверзти потщитесь.

Богородичен: Яко престол огнезрачный Царя носиши Твоего: Егоже умоли, Дево, Царствия сподобити мя, песнословяща верно предстательство Твое.

## Песнь 8.

Ирмос: Покрываяй водами превыспренняя  
Своя, полагаяй морю предел песок, и содержи  
вся, Ты поет солнце, Ты славит луна, Тебе  
приносит песнь вся тварь, яко Содетелю всех во  
веки.

Аще и веру истинную содержу во уме своем,  
святителю, но хладна и боязлива есть душа моя,  
обаче на твой мученический взирая подвиг,  
помощь твою призываю, да огня любви Божия  
дар испросиши сердцу моему.

Ревность твоя о вере подобна тех блаженных  
бысть отрок, иже в пещь огненную вшедше,  
Господа тамо прославиша. Ты же проповедания  
славы Божия ради, в путь смертный мужески  
устремился еси.

Иисуса Христа глагол страдальцев за веру  
ублажающий, на тебе, отче, исполнение сугубо  
прият, не точию бо на небеси радость тебе  
дадеша, но и zde на земли слава твоя всюду  
проповедуется.

Егда сия слава возмогла бы душу твою  
радовати, аще бы не сугубую радость дух твой  
прият еже прошения человек слышати и  
исполняти, якоже рече Христос: блаженнее есть  
паче даяти, нежели приимати. Убо и наша  
приими смиренныя молитвы.

Богородичен: Последовати мне, Всечистая, преподобно пожившим жительством добродетельным сотвори, враги поражающе, нещадно мя оскорбляюще, и к плотским ползущу страстем непрестанно стужающе, да радуясь зову: людие, превозносите Христа во веки.

### Песнь 9.

Ирмос: Благословен Господь, Бог Израилев, воздвигнувший рог спасения нам в дому Давидове, отрока Своего, в нихже посети нас Восток с высоты и направил ны есть на путь мира.

Песнь возснем Господу Богу Израилеву, Иже небо звездами украсивый и Церковь Свою светочами благочестия и правды присно венчает, да во след их текуще, людие к вечному свету возводятся.

Еждение Божие на небеси прослави со страхом пророк Аввакум, мы же обнесение мощей твоих вокруг великия церкви на каждое лето творяще со безчисленными людьми помощь твою призываем.

Слово Божие из уст твоих людем изобильно проповедашеся, ныне же нетленное твое тело безмолвно силу Божию проповедует. Еюже огради стадо твое, блаженне.

Нашего усердия не омерзи, святителю Божий, и неразумения нашего не возгнушайся, но от верующих сердец песнь сложенную прими и благодати дар нам от Господа низпосли.  
Богородичен: Боголюбивая Дево, благаго моли Сына Твоего и Господа выну, озлобленную прилогми душетлителя змия, и изнемогшую мою душу исцелити и спасти, и всякими ублажити светоносными восхожденми.

Светилен праздника.

Слава, святому.

Подобен: Духом во святилище:

Духом твоим, святителю Макарие, присно с нами пребуди и не престани паству твою теплым предстательством заступати, яко веры учитель и иерарх и мученик, Господу зело угодный.

И ныне, праздника.

На хвалитех стихиры на 6,  
праздника 3 и святого 3, глас 4.

Подобен: Званный свыше:

Званный от Бога / гласом церковным / и на престол святительский превознесен быв, / и сам на путь Господень / призывал еси ближних своих / учением книжным / и молитвою тех просвещая, / и образ ревности о Православии

всем показуяй. / Темже и мы веру отец наших /  
добре содержаще, / воспеваем тя любовью, /  
отче преподобне.

Умиленным сердцем / и душою благоговейною /  
блаженнаго заступника нашего / воспевающе,  
братие, / на подражание ему подвигнемся / и в  
братолюбии добре / подвизатися будем, /  
временную жизнь нашу / ни во что же  
вменяюще, / но о грядущей присно  
помышляюще, / еяже сподоби нас, святе, / к  
Богу молитвами твоими.

Исцеления чудная, / бывшая от мощей твоих, /  
святителю, памятующе, / ныне на моление  
собрахомся, / да и на грядущая времена /  
милость твою от нас не удалиши, / но яко чада  
твоя / нас от небес назираеши / и вся, яже  
душам нашим и телесем, / потребная от Бога  
испроси нам, / яко Христов слуга / и людем  
пастырь добрый.

Слава, глас 2:

Днесь прославляется священномученика  
Макария память, днесь христианстии роди  
духовно торжествуем, Силы Небесныя радуются  
о славе мученика и сонм святителей с ликом  
преподобных ликовствует, мы же яко  
научихомся вопием: Господи, предстательством  
святаго Твоего и Пречистыя Твоея Матере,

прощение грехов наших подаждь и душам нашим низпосли мир и велию милость.

### **На литургии**

Блаженна праздника, песнь рядовая на 4, и священномученика, песнь 6 на 4. Прокимен, глас 7: **Восхвалятся преподобнии во славе и возрадуются на ложах своих. Стих: Воспойте Господеву песнь нову, хваление Его в церкви преподобных.** Апостол ко Евреем, зачало 334. Аллилуия, глас 2: **Священницы Твои облекутся в правду: Евангелие от Луки, зачало 67.** Причастен: **В память вечную будет праведник:**

[Текст бденной службы священномученику Макарию, митрополиту Киевскому, воспроизводится перенабором в гражданице по «**Печерской Минее**» (т. II, стр. 57 – 69)]

